

20  
21

# ISLA ((•)) ONLINE

Diaranson 8 December 2021

Email: [IslaOnline@gobierno.aw](mailto:IslaOnline@gobierno.aw) Tel: 528-4952

NOTICIA DI GOBIERNO

20  
21

Gabinete Wever - Croes II







# GOBIERNO DI ARUBA UN BIAHA MAS TA INVITA LIDERNAN SINDICAL PA CONTINUA CU DIALOGO



Den nomber di Gobierno di Aruba y Pueblo di Aruba, Promer Minister Evelyn Wever-Croes ta haci un invitacion na lidernan sindical pa sinta cu Gobierno pa dialoga.

“En bista di accionnan organisa pa lidernan sindical diaranson 8 di december, 2021, mi kier reitera e posicion di Gobierno di Aruba. Gobierno ta comprende e lucha sindical y tambe tin comprension pa e posicion di empleadonan publico. Gobierno di Aruba kier mescos cu lidernan sindical. Nos tur kier mira recuperacion di nos pais pa asina tur ciudadano ricibi e salario pa cua nan ta traha.

Pa e motibo aki, for di siman pasa caba, Gobierno a invita sindicatonan pa dialoga y duna sindicatonan tur informacion financiero cu sindicatonan ta desea y indica cu nan no a

haya ainda. Proposicion di Gobierno ta pa sinta na mesa cu sindicatonan y hunto yega na un punto di salida y hunto tambe negocia cu Hulanda. Esaki ta e solucion cu no solamente ta trece beneficio so pa e clase trahado y pa Gobierno, pero tambe ta trece claridad. Lamentablemente, no ta tur sindicato a acepta e propuesta di Gobierno y Gobierno lo sigui cu esnan cu si a acepta e propuesta.

Mi a ripara tambe cu lamentablemente tin lidernan politico cu ta mal uza y mancha e lucha sindical. P’esey, durante mi reunion cu sindicatonan, mi a alerta sindicatonan pa percura pa nan lucha keda un lucha sindical y no un lucha politico. Pa no permiti politiconan cu agenda politico influencia nan y mancha e lucha sindical.



## Continuacion GOBIERNO DI ARUBA UN BIAHA MAS TA INVITA LIDERNAN SINDICAL....

E realidad ta, cu Aruba ta depende di sosten di likides di Hulanda pa e luna di december paga salario di e propio empleadonan publico, pa paga bijstand hunto cu bonus, pa paga gastonan di siguridad di nos pais, di cuida medico, di enseñansa. Pa esaki, nos ta depende e luna aki ainda di e sosten di likides di Hulanda y pa e siguiente 6 luna, Aruba ta depende di esaki. Esaki ta e realidad cu nos ta biba den dje.

E realidad ta tambe cu Aruba ta recuperando y ta den pleno desaroyo. Aruba tin hopi potencial. Pero e realidad ta tambe cu e accionnan di sindicalistanan ta afecta nos recuperacion. Mas lihe nos recupera, mas lihe nos ta bay bek na normalidad. Mas lihe nos recupera, mas lihe e recorte di salario lo wordo elimina.

Mi ta ripiti. Gobierno kier mesun cos cu lidernan sindical. Pa cua motibo tambe nos a acerca mediador. Mi ta invita e lidernan sindical un biaha mas, pa continua cu dialogo. Tempo no ta na nos favor. Tempo pronto lo caba cu nos. Diabierna

17 di december lo tuma luga Consejo di Minister di Reino. Y si nos no yega na algo conhuntito, nos mes ta duna Hulanda atrobe oportunidad pa tuma decision pa nos. un decision cu lo por conta pa henter aña 2022.

P'esey, un biaha mas, mi ta extende invitacion na tur lider sindical y enfatisa cu Gobierno kier mesun cos cu boso. Gobierno kier drenta den e fase di recuperacion y den e etapa na unda cu Aruba no ta depende di Hulanda, y asina elimina e recorte di 12.6 di salario. Pa logra esaki, nos mester dialoga. E comision financiero cu Gobierno a apunta ta cla pa reuni cualkier momento. Pero tempo no ta na nos favor.

Mi ta haci apelacion na nos clase trahado, tur esnan cu ta wordo afecta pa e accionnan aki, por favor, papia cu bo lider sindical. Ban corda cu na e momentonan aki, Aruba ta den pleno recuperacion. Pero, nos no a yega ainda. Na e momento aki Aruba tin mester di nos tur pa logra recuperacion, bienestar y progreso di nos pais".

## Gobierno di Aruba:

**Durante Consejo di Minister na San Nicolas, Señor Aldrich Croes a presenta**

# PROYECTO TURISTICO RIBA E TEMA DI SEGUNDA GUERA MUNDIAL

Diaranson 7 di december, e Prome Consejo di Minister pa Gabinete Wever-Croes II a tuma luga na Nicolaas Store na San Nicolas. Tur Minister tawata presente hunto cu San Nicolas Business Asociation (SNBA) na unda cu varios inversionista interesa den e desaroyo pa San Nicolas a duna presentacionnan hopi interesante di proyectonan grandi, mediano y chikito cu sigur lo trece desaroyo hopi importante pa Aruba y pa San Nicolas principalmente. Señor Aldrich Croes a splica riba un proyecto turistico cu Gobierno kier bin cu ne riba e tema di Segunda Guerra Mundial.

Aruba Amenaties ta un comision cu ta traha riba con por upgrade/mehora e patrimonionan di Aruba y crea un experiencia pa nos hendenan local y bishitantenan. Como parti di con pa crea e 'orange economy' / economia creativo rond di e patrimonionan.

E proyecto presenta tabata di Sero Colorado / San Nicolas, cu enfoca riba kico ta e posibilidad pa crea un area of monumento riba Sero Colorado y haci un patrimonio cu ta trece turista y bishitantenan riba e sero y despues trece nan den ciudad di


San Nicolas.

Sr. Aldrich Croes a presenta e potencialnan di e proyecto cual ta entre otro pa haci e sero un monumento special di e epoca di guerra ora cu Alemania a ataca Aruba. Haciendo uzo di e hechonan historico riba e sero caminda cu ainda tin cañon y fundeshi. Mescos cu otro areanan den San Nicolas manera Kustbaterij y refinaria. Uzando e factornan aki por crea un tour hunto cu atraccion riba e sero y despues conecta esaki cu San Nicolas.



E proyecto lo haci cu e ciudad riba su mes esta San Nicolas, Sero Colorado y e area, por sirbi e ciudad y pueblo di San Nicolas cu un economia creciente creativo hunto cu su galerianan di arte. Caminda artistanan di Aruba por traha arte, cuadro, pronkstuk/ souvenir y bende. Restaurantnan tambe por habri y ricibi e bishitantenan. Pues e ta un proyecto grandi riba su mes cu ta encera varios Ministerio trahando hunto. E comision ta haciendo e trabou ey y aworaki e ta den e fase di presenta e proposicionnan aki na Gobierno.





## Minister Ursell Arends: PABIEN NA FUNDACION MOVEMENTO TA BIDA



Ta importante pa nan salud y calidad di bida, cu nos adultonan mayor keda fisicamente y socialmente activo pa mas largo posibel, asina eherce e practica di "active aging". E no ta secreto cu un persona di edad cu ta mantene su mes activo ta preveni varios malesa y atraso den salud mental y fisico, compara cu si e persona no tabata activo.

Dialuna ultimo, Minister di Asuntonan di Adulto Mayor, Sr. Ursell Arends tabata presente na un actividad di pasco organisa pa Fundacion Movimento ta Bida. Durante e evento aki Minister Arends a haya oportunidad pa hiba palabra na e grupo grandi di miembronan, y a keda masha contento cu e recepcion caluroso. Durante e evento Minister Arends tabata tin e oportunidad tambe di combersa cu varios miembro, pa cual nan luchanan no ta desconoci cerca minister: limitacion di movilidad, falta di cuido integral, vivienda y costo di bida manehabel ta algun cu pa Minister ta prioridad pa atende cu nan.

Durante su discurso, Minister Arends a subraya riba e importancia pa nos adultonan mayor keda activo mas hopi posibel, no solamente den movecion fisico pero tambe socialmente cu amistadnan. E lasonan di amistad ta prolonga



e bon estado di salud mental, y ta pakiko organisacionnan manera Movimento Ta Bida ta hunga un rol asina importante den nos comunidad.

Un palabra di felicitacion na e organizacion y tur su miembro nan, pa e bon trabou y esfuerzo continuo pa keda promove e calidad di bida di nos adultonan mayor. Minister Arends a caba na desea cada miembro un Bon Pasco y Prospero Año 2022.





**Minister Xiomara Maduro ta informa:**

**GOBIERNO DI ARUBA A BRINDA DEN AÑA  
2020 Y 2021 UN SUMA TOTAL DI 422.8  
MIYON FLORIN NA SUBSIDIO DI SALARIO**

**Pa por a mantene cuponan di trabao**



Minister di Finansa durante conferencia di prensa di Gobierno di Aruba a trece dilanti cu pa locual ta e parti di Subsidio di Salario, siman pasa durante un reunion publico Parlamento di Aruba a legaliza e Subsidio di Salario cu a wordo duna na comercio pa asina nan por a enfrenta y surpasa e pandemia den 2020 y 2021. E meta di e yudansa aki ta pa conserva cupo di trabao na beneficio di Aruba su economia.

Gobierno a brinda e yudansa cu e fondo di likides ricibi di parti di Hulanda. Esaki a wordo brinda na comercio pa asina por mantene cuponan di trabao de lo contrario un cantidad grandi di trahadornan lo a perde nan entrada. Den aña 2020 a duna 271.1 miyon florin na Subsidio di Salario y na 2022 a duna 151.7 miyon florin pa un suma total di 422.8 miyon florin den forma di Subsidio di Salario.







## OFICINA DI TURISMO NA SAN NICOLAS A CONOCE UN SUBIDA SUBSTANTIAL DEN E CANTIDAD DI BISHITANTE

Diamars atardi Minister di Turismo Sr. Danguí Oduber a bishita e Oficina di Turismo na San Nicolas. E oficina aki tabata cera y Minister Oduber a zorg pa e habri bek na aña 2019 pa brinda servicio na e turistanan cu ta bishita San Nicolas. Minister Oduber ta kere firmemente den e potencial cu San Nicolas tin pa bira segundo capital turistico di Aruba.

Pa locual ta trata e cantidad di bishitante cu a haci uzo di e Oficina di Turismo aña aki, e cifra a conoce un subida substancial compara cu aña 2020. Si haci un comparacion di e ultimo tres lunanan compara cu aña 2020 por mira un diferencia grandi den e cantidad di turista cu a bishita e Oficina di Turismo na San Nicolas.

*Aki por mira un comparacion di e cantidad di bishitante entre aña 2020 y 2021*

	2020	2021
September	65	370
Oktober	107	523
November	74	370

E oficina di Turismo ta opera di dialuna pa diabierna dentro e orario di 9am pa 5pm. Na e oficina e turista lo ricibi tur informacion di kiko tur San Nicolas tin di ofrece. E tourguide lo comparti su conocimiento cu e turistanan na un manera profesional, un di e tournan ta e tour di e murayanan di arte den mainstreet.

San Nicolas ta rico den historia, cultura y arkitektura, e turistanan por haya un refleho di e bida diario di e habitantenan di San Nicolas. San Nicolas ta un ciudad bieu y alaves nobo, fuerte y tradicional pero semper evolucionando. Minister Danguí Oduber ta kere den e potencial di San Nicolas y lo zorg pa San Nicolas haya su fair share. Pa e motibo aki Minister Danguí Oduber ta bay sigui inverti den e Oficina di Turismo, San Nicolas ta hayando e atencion cu e merece.







## Minister Geoffrey Wever: CONGRESO ORGANISA PA BIBLIOTECA NACIONAL CU TOPICO "ECONOMIA CIRCULAR"



Siman pasa Minister Mr. Geoffrey Wever, di Asuntonan Economico, Comunicacion y Desaroyo Sostenibel, a reuni cu directora di Biblioteca Nacional, señora Astrid Britten y funcionario di Biblioteca Nacional sr. Ronny Alders, den preparacion pa un congreso cu Biblioteca Nacional lo organisa na April 2022, cu e topico "Economia Circular".

Biblioteca Nacional tur aña ta organisa un congreso "Sustainable Education Symposium" y e aña aki a scohe e topico "Economia Circular" y den e cuadro ey a pidi Minister Wever como minister encarga cu ambos economia y desaroyo sostenibel pa ta un orador durante e congreso aki.

"E ta un honor di por forma parti di e congreso aki como orador, e topico di "Economia Circular" ta forma parti integral di nos maneho pa e proximo 4 ananan", segun Minister Wever. "Mi ta hopi contento pa wak con Biblioteca Nacional ta carga e topico

di sustainability y mi ta honra pa por duna mi contribucion".

Economia Circular ta un modelo economico unda material prima, componente- y productonan ta perde nan balor menos posibel door di wordo reapropia of ta wordo reuza den e proceso di produccion.

Mirando cu Aruba ta un pais cu te ainda ta importa casi tur cos y cu Aruba tin su retonan pa tratamento di desperdicio, nos mester haci un transicion structural den nos sociedad, caminda por ehempel ta modifica e manera con nos ta construi, pa haci esaki na un forma mas duradero, pues usa tecnologianan y materialnan di construccion cu ta produci menos "waste" posibel y caminda materialnan por wordo reintegra of reuza den futuro. "Nos ambicion ta pa haci un transicion como pais riba e tereno aki", segun Minister Wever.





## Minister Rocco Tjon: A FIRMA UN MOU CU MENTAL HEALTH CARIBBEAN (MHC) DEN CUADRO DI SALUD MENTAL

Awe mainta, durante un conferencia virtual, Minister di Husticia y Asuntonan Social Sr. Rocco Tjon a firma un MOU cu un di e socionan den nos region, esta Mental Health Caribbean (MHC), pa loke ta e tematica di adiccion y salud mental. Lo bay coopera mas di serca cu otro, especificamente riba e parti di experticio y e parti di cursonan cu ta un parti hopi importante tambe. Pa e motibo aki, na comienso di otro aña lo bay tin un curso pa profesionalnan den e ramo di salud mental, di cual un grupo grandi lo bay participa. E meta final ta pa logra haci e cuida di salud mental uno mas accesibel como tambe baha e listanan di espera, y a traves di e tipo di cooperacionnan aki logra accelera e procesonan aki.

Segun Minister Tjon a splica, den e MOU tambe a incorpora cuatro punto specifico. A incorpora e parti di crea mas cooperacion di uso di documentonan standardisa, en bes di reinventa e wiel. Tambe a toca e parti di “bemoeizorg”, cual ta e ayudo cu por brinda na adiccionan riba caya, pues lo bin cu un proyecto riba e tematica aki pa asina percura pa brinda e ayudo necesario pa esnan cu tin mester di dje. Adicionalmente y especificamente, pa loke ta trata Cuerpo Policial y esnan cu ta traha na KIA, tambe lo bin cu un curso riba e tematica di “verslavingszorg” y salud mental. Esaki ta hopi importante pa Cuerpo Policial mirando cu e agentenan policial ta bin den contacto hopi bes cu e esnan cu ta sufrir di adiccion of di e parti di salud mental. Mescos e ta conta pa e trahadonan di prizon, y eyan principalmente, lo percura pa na momento cu un persona sali for di KIA, y prome cu e sali caba, percura pa di e forma aki su reintegracion y resocialisacion ta uno mas exitoso.





## Continuacion A FIRMA UN MOU CU MENTAL HEALTH CARIBBEAN....

E MOU ta toca tambe e parti di prevencion, cual ta un punto hopi importante, mirando e experticionan cu ta necesario pa por atende cu e aspectonan aki, ta haci cu e ta importante pa traha mas di serca cu otro den Reino. Asina, luna pasa tawata tin un congreso aki na Aruba mes caminda e diferente organisacionnan manera RESPALDO y nan contrapartidanen den Reino tambe a firma un MOU, caminda nan tambe lo bay traha mas di serca cu otro. E motibo pa esaki, hopi bes tin di haber cu con costoso e ta pa brinda e ayudo aki y pa e motibo ey si nos logra uni forza nos por brinda un ayudo mucho mas miho.

Por ultimo e Mandatario a splica cu, a reuni cu FADA, caminda na comienso di aña nan lo anuncia e adaptacion di nan "business model" caminda nan lo bay enfoca hopi riba e parti di salud mental tambe. Recientemente, Minister Tjon conhuntamente cu Minister President Sra. Evelyn Wever-Croes a reuni cu Parlamento Hubenil caminda a scucha varios di e preocupacionnan di e hobennan, cual un di nan ta toca salud mental. A papia tocante e importancia di haci e ayudo aki

accesibel pa alumnonan di scol tambe. Asina e Mandatario a expresa cu di parti di Ministerio di Husticia y Asuntonan Social sigur lo kier percursa pa salud mental no ta un taboo mas, y asina brinda e ayudo necesario. Pa e motibo aki, otro siman hunto cu demas instancianan cu ta encarga cu salud mental, manera FMAA, SPD y RESPALDO lo firma un MOU caminda lo percursa pa e procesonan aki ta mas alinia na otro pa di e forma ey por brinda un cuido di calidad mas halto y asina tambe percursa pa e cuido aki ta uno mas accesibel.







## DEPARTAMENTO ENCARGA CU IDIOMA NA DEPARTAMENTO DI ENSEÑANSA A DUNA PRESENTACION NA MINISTER DI ENSEÑANSA Y DEPORTE ENDY CROES



Diahuebs ultimo Minister Endy Croes a reuni cu sra. Audrey Tromp – Wouters y sr. Juan Maduro di departamento encarga cu idioma di departamento di enseñansa. Durante e reunion e Mandatario a haya un presentacion extenso di e importancia pa tin un instituto di idioma na Aruba pa salvaguardia Papiamentu.

Idioma Papiamentu ta forma un parti di nos indentidad mescos cu nos Himno, Bandera y Escudo. Meta y tareanan di un instituto ta entre otro maneho di idioma nacional y cuido y desaroyo di Papiamentu. E instituto lo atende cu trabounan linguistico, produccion di obra literario, material di sosten, trabounan di maneho di idioma nacional, cuido y desaroyo di Papiamentu.

Durante e reunion a pidi cooperacion di Minister Endy Croes pa lanta e instituto mas pronto posibel. E Mandatario a compronde e importancia di e instituto aki pa nos pais y lo traha riba nan peticion.







## Minister Glenbert Croes ta anuncia: **ACUERDO ENTRE WEB ARUBA NV Y EAGLE LNG**

Minister Glenbert Croes diamars ultimo durante su rueda di prensa, a anuncia cu WEB Aruba NV y EAGLE LNG a yega na un acuerdo y cu dia 9 di december lo tin e ceremonia di e firmamento durante un rueda di prensa na Nicolaas Store. Un iniciativa cu a cuminsa ya caba for di 2016 sin cu nunca a logra cristalisa. Pero tabata na 2020 cu Gabinete Wever Croes 1, bou liderazgo di nos Minister President encarga cu Energia, a cuminsa cu proceso di un "Request for Expression of Interest" pa cu sea un posibel reapertura di nos Refineria of otro industrianan alternativo. Durante e proceso aki diferente opcionnan a bin riba mesa. Y despues di un proceso scrutinario, EAGLE LNG a wordo scogi pa sigui negocia cu ne pa posibel introduccion di gas aki na Aruba.

E proyecto di LNG ta di vital importancia pa Aruba. Y awe orguyosamente Gobierno di Aruba por anuncia cu WEB Aruba NV y EAGLE LNG a yega na un acuerdo pa cambia Aruba for Heavy Fuel Oil pa LNG (Liquid Natural Gas).

EAGLE LNG ta bay inverti alrededor di \$110 milyon dollar. 200 milyon florin cu EAGLE LNG ta inverti den e infraestructura di proyecto aki pa Aruba por ricibi gas natural.

Kico e ta significa pa Aruba:

Pa Aruba e ta di vital importancia. Pa WEB Aruba NV e lo significa pone un fin na uzo di Heavy Fuel Oil. Ora nos ta papia di proteha nos Medio Ambiente, ora nos ta papia di stabilisa tarifa di awa y coriente, ora nos ta papia di yuda WEB opera a base di procesonan mas limpi y eficiente cu lo yuda e operacion di WEB enormemente den p.e. gastonan di mantencion, LNG ta di vital importancia.

Cu e acuerdo aki, WEB Aruba NV lo cumpra gas na un prijs historicamente mucho mas abou cu WEB a yega di cumpra na Heavy Fuel Oil, garantizando y stabilizando un prijs di awa y coriente sumamente beneficioso pa henter nos comunidad.





## Continuacion ACUERDO ENTRE WEB ARUBA NV Y EAGLE LNG....

Pero ademas cu e ta di vital importancia pa WEB Aruba NV, e ta di suma importancia tambe pa RDA. Awo cu EAGLE LNG a yega na un acuerdo cu WEB Aruba NV, e negociacionnan ta cuminsa pa loke ta trata e inversion di e infraestructura cu lo bin riba tereno di RDA.

Cu introduccion di LNG na Aruba nos ta rumbo pa introduccion di Hidrogeno na Aruba.

E transicion ta di Heavy Fuel Oil pa LNG tin como e meta final di yega na Hidrogeno. Pero nos tin un caminda pa cana di transicion. Un di e decisionnan di mas importante cu nos ta tumando ta di laga Heavy Fuel Oil y Diesel pa pasado unda cu lo uza e LNG como e 'transition fuel'. Y esaki combina cu e energia alternativo manera energia solar y di biento, lo suministra WEB tur e energia cu e mester, rumbo introduccion di Hidrogeno cu ta e meta final.

Nos ta transformando nos Pais, haciendo Aruba un isla mas limpi, pa nos mes y nos futuro generacionnan stabilizando tarifanan di awa y coriente pa henter comunidad cumprando e gas for di EAGLE LNG.

E proyecto aki ta trece nos mas cerca tambe di un posibel

reactivacion di nos Refineria cu tambe mester wordo opera riba energia limpi y alternativo, cu tecnologia moderno protehiendo nos medio ambiente a base di gas.

E acuerdo aki cu EAGLE LNG, ta crea un industria adicional pa Pais Aruba esta di por bay haci 'bunkering' pues almacenamiento di gas aki na Aruba convirtiendo Aruba como e puerto unda p.e. Cruseronan por abastace nan necesidadnan. Aruba por bira e 'tankstation' den Caribe pa suministro di gas.

E cantidad di cuponan di trabou cu e lo genera cu construccion di e planta lo ta alrededor di 200. Nos lo tin e EAGLE LNG desk na DPL disponibel pa intermedia pa nos hendenan local y nos contratistanan local bin na remarca prome. E lo no ta manera den pasado cu ta un compania so ta haya tur trabou na refineria. NO!

Tur lo haya un fair chance aki na Aruba pa nos haya e spin off economico cu nos Pais mester di dje.

Minister Glenbert Croes: "E ta un proyecto sumamente importante pa un Aruba cu ta stima su medio ambiente, cu lo produci energia a base di energia limpi."



**DPL**  
DEPARTAMENTO DI PROGRESO LABORAL  
*Hunto Creando Progreso Laboral*

# LISTA DI VACATURA

Siman # 48



**Administratief Medewerker**  
Aluminium Fabricator  
Bar Assistant  
Bodyman  
Bouwkundig Ingenieur  
Busser  
Cashier  
Civil Engineer  
Cleaner  
Cook  
Cook Helper  
Dishwasher  
F&B Revenue Optimization Manager  
Gardener  
Glas Blazer  
Glas Snijder  
Guest Service Representative  
Helper Constructie  
Houseman  
Installateur  
Kapper  
Kitchen Attendant  
Kitchen Helper

Koelmonteur Helper  
Machine Operator  
Medewerkster Borduur en Ontwerp  
Merchandiser  
Metselaar  
Meubelmaker  
Productie Assistant  
Production Manager Brew House  
Produktie Medewerker  
Restaurant Manager  
Retail Trade Manager  
Room Attendant  
Senior Associate (Accountant)  
Senior Assurance  
Senior Audit Manager  
Silver Specialist  
Slager  
Specialist Products Cosmetics  
Stoffeerder  
Supervisor  
Tax Manager  
Tire Changer  
Uitwonend Huishoudelijk Personeel  
Waiter

**Solicita!**



**dpl.aw**

**Bo ta interesa pa solicita, email: [dpl.jobcenter@aruba.gov.aw](mailto:dpl.jobcenter@aruba.gov.aw)**

**Corda indica vacatura di bo interes y DPL lo tuma contacto cu bo personal,**



## Departamento di Salud Publico: UPDATE 8 DI DECEMBER 2021

Segun resumen di awe 18 persona a recupera y un total di 21 caso nobo di COVID-19 a keda registra di cual 2 ta no-residente. E cifranan aki ta representa un 'Positivity rate' bou di nos residentenan di 10%. E cantidad di casonan activo di COVID-19 pa awe ta 181 y cantidad di fayecidonan relaciona cu COVID-19 a aumenta na 176. Forsa na famia di e fayecido. Datos ta ilustra casonan nobo di COVID cu un average semanal

di 19 caso pa dia y un averahe di 'positivity rate' semanal di 13% pa dia.

Actualmente na Aruba tin 5 persona interna debi na COVID di cual den ICU tin 3 persona y riba piso general tin 2. Na Colombia tin actualmente 9 persona den ICU y 3 riba piso general.

8/12/2021	TOTAL	RESIDENTE	NO-RESIDENTE
<b>Casonan Nobo</b>	21	19	2
Activo	181	148	33
<b>Recupera</b>	16136	14555	1581
Positivo	16505	14887	1618
<b>Morto</b>	176	172	4
Vacuna	83861	-	-
<b>Hospitalisa</b>	5	-	-
AUA			
ICU	12	-	-
AUA COL	3 9		

HABITONAN PA KEDA  
*Saludabel*  
DEN TEMPO DI COVID-19 Y VACUNACION



**VACUNA**  
PA NOS POR  
progresar

### Limita comemento di 'junk food'

Come menos 'junk food'. Limita mas tanto cu ta posibel tur tipo di buscuchi, mangel, cos dushi, batata hasa, chips, refresco, juicenan artificial y bebidanan cu hopi sucu. E productonan aki ta incentiva hiperactividad den e muchanan, ta debilita organismo di tur edad y ta relaciona cu aumento di peso. Pa combati COVID-19 bo mester mantene bo salud y vacuna, ya cu ta comproba cu e vacuna tin un efectividad halto pa proteha bo y evita transmision. Ban uza tur e hermentnan cu nos tin pa caba cu e virus aki na nos isla!

**Ami SI**  
ta vacuna!



Mantene 1.5M  
minimo di distancia



Laba man  
frecuentemente



Uza tapa boca  
paden di tur lugar.

**VACUNA!**





*Un Feliz Dia*

**ISLA ONLINE**

NOTICIA DI GOBIERNO